

良鄉縣志序

邑之有志由來已古所以爲行政者藉手之資也良屬京畿近邑風俗醇良其得嘉名者以此至邑之有志創之者爲明嘉靖年間安公守魯續修者爲前清康熙年間李公慶祖楊公嗣奇至光緒己丑范公履福又復重修然年代變更日新月異迄於今又三十餘年矣中間政治沿革時俗變遷不能不有所出入余下車伊始卽擬續而纂之適境內遘兵未果迨事平後乃邀邑中各士紳從事於此主纂者爲呂君植見君之深副之者爲吳君士傑游君從仕魏君士儒吳君士英呂君蘊華越八月而告成余詳加攷訂見綱舉目張有條不紊乃重歎爲良史才也諸君復請敘以弁首余雖不文然幸繼安李楊范四公之餘業附諸君子之末光有榮耀焉故不辭而爲之序

中華民國十三年季春月知良鄉縣事周志中撰

良鄉縣舊志序

前明翰林 郭秉聰

良鄉畿輔首縣縣志久闕至止者慨焉豈以路當要衝使輶旁午疲於賓餞無暇及此耶黔南安侯履任二載政通人和百廢俱興謂志之係於邑也甚重乃銳意創修請鄉大夫箕蜂楊公博取羣書旁詢故老爲之蒐羅幽逸凡有關於政教者攬錄罔遺彪分臚列纂次成編一切撰述楊君獨任其責越三月告成而侯復加校閱裁正焉果足以信今傳後矣乃謀梓鋟屬予爲序夫古者地里有圖有誌蓋周官職方氏與小史外史所序而道以詔王者非徒飭吏事廣見聞已也良鄉隸順天府其邑之山川田賦宦迹民風與夫人材物產載在一統誌邑誌若可無者然一統誌天下之書也其法略邑誌一方之書也其法詳猶史家之有本紀以舉其綱必有列傳以張其目也況良於甸服在一同而內者乎故吏斯土者觀山川則知地形之險易觀田賦則知公歛之厚薄觀宦迹則知吏治之得失觀民風則知習俗之醇漓觀人材則知世運之升降觀物產則知民需之豐嗇考據既真籌畫斯允因時敷政通變宜民而生斯地者觀感興起咸有所資焉其爲治化之助豈小補哉侯又奉當事建議承

檄修邑城告竣在邇畿南永賴皆曠舉也而誌適成可並垂不朽矣侯名守魯字汝確號文崖黔南人壬子經元楊君名守正字汝靜興州中屯衛人以明經尹固城誌凡六卷是爲序

舊志序後概不紀年令閱者茫然殊不可解以後二序考之此序當在前明嘉靖三十九年歲次戊午良邑有志此其權輿也台山郝錫疇識

良鄉縣舊志序

康熙十二年
癸丑知縣

李慶祖

維王建國辨方正位體國經野設官分職以爲民極乃立職方氏以掌天下之圖書殆文獻之昉乎推而至於郡縣莫不有志然而膺斯任者非具上下古今之識不足以談天下之事是故不鑒已往無以知來不觀已著無以察微則網羅舊文撫拾故典非謂矜博雅實以經世務也夫天地之氣運風俗方域之鍾靈毓秀以至紀綱法度祀典賓興財賦兵戎偶舉一事而事之本末因革未能燭照數計亦何以布政宜民垂庥光而昭後世耶余自辛亥春承乏茲土撫失業之殘黎整首衝之罷敝弭嘯聚於未萌起衰頹於既往又何敢拮据之不早綢繆之不豫哉今日者歲序粗稔人才奮興不揣固陋欲急蒐邑志以悉人物風俗之勝徒得之父老傳聞被厄秦火者久矣忽蒙憲檄恭遇聖天子嘉納端揆之建白勅集通誌以備一代之興事固盛舉促應實難幾煩搜訪一日得之邑紳侍御張君張君以渾金璞玉之資抱博古通今之學出家藏秘本爲君胞兄斥邱尹所夙構者舊志距今一百一十五年矣時移事變百餘年之行事未續雖舊冊僅存與無冊同爰開誌館以纂修之事託重張君復

延茂才數人佐之仰察象緯俯覽山川中極人事綜據六經博採史傳禮耄而諮詢式遺賢而訪問百有餘年之事燦若懸璫而百餘年以前之事亦因之以傳但披覽往帙有止詳故實不載論議者悉增之有宜於往昔不切今茲者悉刪之斟酌必期於當校讎必極其精余又從而論定焉綜其大旨參其未備釐其所不急俾其志圖說也謹而確原隲在望衡紀垂芒無忘小民之依感召之理焉其志田賦也典而法田分三則賦分三則期不失先王什一取民之制焉其志人物也立意嚴而存心恕不因所喜而飾之不因所惡而掩之其志藝文也愼而有體有關於經濟有堪爲儀型者方取焉其建置與官師可志也可大可久勲業在一時功德在奕世千載之松楸百年之俎豆視之如一日焉後之人考憲典而敷政教式前烈而惠下民胥賴是也志之關於治道不甚鉅歟夫統立其綱而次之有序復晰其目而論之有端按圖索意仰副德心其於聖王體國經野設官分職之意亦可以稱塞於萬一矣余何敢以固陋自諉哉

良鄉縣舊志序

康熙四十年
辛巳知縣 楊嗣奇

方今皇上命翰林儒臣纂修大清一統志樂觀厥成用以黼黻太平輝煌治道甚鉅典也凡在百爾臣工何幸躬逢其盛普天率土自當鼓吹休明拜揚聖德乃嗣奇以疎逖小臣於庚辰春仲謬膺簡書司牧良邑甫受事卽欲得本縣邑乘考稽我朝歷任是邑循良著績者爲法不意蒐求後僅得寫冊三本係前令李公慶祖與邑柱史張公諱環者重修之書反覆披閱但見字多魚魯殘缺未備爲康熙癸丑歲所構造夫自癸丑距辛巳將及三十載其間官師之去留士民之習尚土田賦役之規制不知幾經變易矣顧今闕略未補他日太史採風邑屬畿南首善將何以憑籍仰副聖天子稽古右文之盛治乎不幾辱朝廷而羞縉紳耶爰謀諸學博李君維翰二尹孔君衍杰暨邑貢士見聖庠廩生陳圯唐美中且俾鄉耆里老訪輯四境軼事有關政教風化者添入簡末相與叅互考訂訛者正之繁者芟之缺者補之更不吝捐俸助資繕寫四本用付剞劂裝訂成書以便觀覽卽未必功同信史庶幾一邑文獻頗有足徵竊附續貂前人之意云耳敢謂職任衝罷小邑勤勞王事救過不遑修辭著書

非不敏之責也哉遂援不律而爲序

重修良鄉縣舊志序

光緒七年
知縣陳崑

良邑東接宛平南鄰涿鹿西與北毘連房山廣袤相準方僅四十里其山燎石岡一培塿也其水廣陽河一衣帶也其俗樸素其民彫剝然近畿各縣號繁劇者獨以良鄉稱首誠以密邇國門拱衛神皋東南十三省有事京師者無不取道於斯冠蓋之送迎邸舍之供頓文移郵遞之分遞進奏飛騎之交馳方物入貢晝夜之護持餉車轉運遠邇之巡警轟隱旁午徵呼絡繹小民拮据供役日不暇給兼之境內土田多隸旗莊畝漕隱沒佃租輾轉爭訟不已趾錯於門官斯土者措置一有不當謠諑決裂每至不可收拾以故前人創修縣志垂法後來意甚厚也乃自康熙癸丑辛巳兩次修補迄今百八十年無鉅本方今國家中興百廢具舉大府輯修畿輔通志分飭屬邑各修志乘以備采擇庚辰冬月崑權攝斯邑下車伊始卽事搜羅舊稿僅存焉烏譌外文獻無徵傳聞互異欲擇撫案牘則自道光壬辰河伯告災斷爛無一存者爰爲倡捐開館延司鐸郝君壽田暨游君雪門薛君召棠秉筆編訂復屬紳耆徐君南村諸君子佐之崑治事之餘參觀校閱稽核舊志博訪遺佚遠旣無徵姑從闕略

近而可信必致周詳義取臚新例兼述舊凡六越月而告成然後一邑之典章規制
燦然可觀焉夫時移事殊今昔不同仍舊貫者知成憲之當遵隸新章者知改絃之
有自由是稽田賦察戶口利弊所在若判黑白庶幾彫剋可復繁劇可治爾後之君
子隨時增葺勿復如前日之廢墜是則帽所厚望也夫

良鄉縣舊志序

光緒十五年
知縣范履福

郡縣之有圖志尙矣古之爲政者必先采其風謠相其土宜經理其山川考正其貢賦與辨夫人才之升降鄉俗之醇漓然後因地布化隨俗致理得以有所藉手自職方氏掌天下之圖而圖經始見班孟堅載地理之志而志書始行志固史之類也故修史之難無出於志昔江文通嘗言之矣良鄉古屬幽州於天文爲箕尾分野置縣始於西漢以其人物俱良故名國朝因之邑城土垣而固地當輦轂孔道徵發供億騷然起視四封長短截補僅四十里然北拱都城南控涿鹿東縈灤水西擁房山西山之雲氣奇峯皆得以延之揖之則殊標形勝也民風夙稱樸茂稽戶口蓋萬六千有奇以今較昔爲遠不逮大抵土田糧賦之變易郵政徭役之衝繁有以致之歟俗瘠則施教難秀良子弟或亦銳志磋磨而不以學業爲急務者所在多有科名之未竟暢遂職此故耳此皆考舊志而可知其畧者也舊志始於康熙癸丑歲爲前令李公慶祖所構造迨庚辰歲爲前令楊公嗣奇所刊成迄今一百數十年矣其間官師更替政治沿革時事民情大殊疇昔不知凡幾而志書缺然後有來者將何以按圖

考索而知通變措置之大用耶然則慨往籍之謬悠睇世代之綿邈遺文令緒表章修明非鄉邦士大夫之責而誰責耶鄉邦士大夫未遑修而舉之非官斯土者之責而誰責歟余自承乏茲邑下車後與邑中諸耆秀相商確首稽志事夫志記也士心也士有是心而弗能達之遠且久者非志也見諸行事措諸庶民可以示當世而垂後來用昭余爲士之時心已若此故曰志爰於戊子歲敦禮黃君古腴相與屬稿每卽舊志中取與詳核而文古雅尙合於史法者存之舊所未備而續經採訪者補之其待興創革除不能猝致則詳誌其利弊而以次圖之至徵文考獻有關掌故尤必爲之慎重而周詳亦謂志與史相表裏不容稍有私意爲愛憎也余與邑士大夫常兢兢焉閱六月編成余復詳加考訂綱舉目張瞭然秩然此則矢公矢慎之心可以共白者也若夫宣天家之盛德撫我黎民固縣令責也事不外教養兩端而因地布化隨俗致理其曲盡夫教養之故以求洽於民而止余不敏蓋披覽圖志而益不敢不勉也已爲序

良鄉縣舊志凡例

邑人張璟

由今距舊志創藁百有餘年中更治亂繼以鼎新河山邈然風物蔚起凡民材吏治必將有自困而亨自剝而復以應國家之三階平百度貞者削簡珥筆謹疏條綱目以俟煒煌之書使天下之視畿南彈丸若攝提一星之迴指孟陬也非僅一邑之掌故已也

一前代安邑侯嘉興吾邑披草萊而琬琰之箕峰楊君以邑之子羽克協德心共襄厥美兩君子意良厚尸之俎之勿諼宜矣惟是編從草創意取亟成不無有望於踵事而百易寒暑作者闕焉兼以祝融闕伯實相吾邑取剗剗之故而燬焉靡遺舍舊謀新曷容以已

一事有權輿物有本始志之舊本家孟加意諮訪博爲蒐求乙未入長安得之於方城之友丁未從簿領之隙稍爲更張條紀以當單父之促柱河陽之蒔花然而摛辭傳義則謙讓未遑且兢兢闕文述先待後其慎且難者原以俟之大雅君子是誌也謀之數年而竣於一旦全賴我 父母鐵嶺李侯繪塑丹鉛黼黻鑒定用集

厥成

一綱之數十目之數六十有六維王建國經野夏之貢周之職方輿地之自昉也乃召司空迺召司徒必建置具斯戶口土田賦役隸焉然後治之以官師而人材之淑慝旌別焉其次設教以神其次阜財以物存衛制鑒廢興也書舊例備攷究也紀災祥惕修悖也于是乎受之以賁則藝文終之目之說散見於綱者茲不具述一官師之名宦人材之鄉賢一書之裘領也惟我邦之人好惡也慎取舍也嚴無匿瑕無遺美故茲所登者疑信不敢並傳餘以聽後之論定者

一古之圖與書也合今之圖與書也分凡山川人物禮器古以圖合故精詳今以圖分故鹵莽史之年表皆圖類也未嘗離立於外也凡今之爲志者外圖於條目甚無謂茲獨內之先圖次星野焉

一邑莫重於民事曰戶口曰土田是二者之數又合之以賦役似複矣亦謂其重也宜詳

一舊志孝義綴於選舉之後茲改綴於鄉賢閭巷之善得先於士大夫古者尙德之

遺意歟抑曰三物賓興卽選舉之所自本焉爾

一藝文之於誌猶左右史之紀事必紀言也事取其實言蔚其華華而失實固敝矣實而無華是亦虎豹無文章與羊質等山川無雲霞與裸壤等耳荒墟之斷碣方外之窮碑摩挲洗削固宜有錦心繡口不容滅沒者所當與好古之士同懷蒐討以助炳烺之觀

一天道十年一小變卽如科名之增秩官之易戶口賦役之損益德藝之日新見聞之日廣皆不容俟之數十年今日之事仰奉綸音彙修通誌公祖父母之事也過此以往可任其久而湮軼乎愚擬與同人約凡甲乙丙論升之日卽額輸坊匾銀四分之一以爲纂修之資庶幾文獻勿墜尙有典型

弁言

縣之有志猶國之有史也國有史則凡人才之廢興政治之得失世運之隆污於以共見而後爲治者足以取鑑焉縣有志則凡物產之盈虛風俗之厚薄生齒之登耗於以易明而後地方情形瞭如指掌足以爲發揚自治之基焉若是則志之所關者鉅矣吾良以蕞爾之區地不過數十里民不過萬餘戶而且土地平坦無鑛產水利可言居民以務農爲業又皆泥守舊法而不知所變通地利不興民貧滋甚瘠苦若此似乎無可記錄者然而十步之內必有芳草十室之邑必有忠信面積雖小其中豈無翹然傑出足以光簡冊而示來茲者乎且地有美利而營焉無所知人有節義殊行而闕焉無所表於後亦邑人士之恥也獨是志之失修三十年於此矣十年來曾有人提議及之卒以籌款艱難而止前任劉縣長孟純現任周縣長華萱均以修

志爲當務之急且各捐廉以爲之倡而邑紳閭筱亭王壽彭尹
子珍復捐資以助之客冬由勸學所約集同志籌議進行而得
一簡易之法其法則以事求實際款不虛糜爲主旨不設機關
不定豫算任事者純盡義務惟以所集之款充紙筆印刷之費
閱數月遂告成功特末學淺陋糾繆殊多不過綿將墜之緒已
爾至於抉摘奧要敷揚菁華聊以俟博雅之君子

中華民國十三年春月修志同人謹識